

## 1 TESALONICENSES

### *Pablo Cui'ne I Cōcohua'i Toyaye*

<sup>1</sup> Yě'ë Pablo cui'ne Silvano cui'ne Timoteo cōni toyayë, iye toya ja'hua. Maija'quë do'ijëna, Tesalónica daripë pa'icohua'ina Maija'quëna tsioni cui'ne Jesucristo ja're pa'icohua'ina, Maija'quëpi cui'ne mai Ējaë Jesucristopi cōni coa isiyepi, de'oye pa'ijë'ë.

### *Tesalonicenses Pai Iñose'e*

<sup>2</sup> Mësarute Maija'quë huasose'ere cuasajë si'anë Maija'quëre secacaiyë, de'oji cajë ite pëpayë. <sup>3</sup> Cui'ne mësaruru mai Ējaë Jesucristopi si'aye ne tì'acaiye paji cuasajë ocue pa'i macarepa uteyepi cōcaina, si'aye yo'o jujama'pë ai yo'oye pa'itojë quëcohuë. Cui'ne Maija'quë pa'ire paji cuasayepi co'amaña nehuë. Cui'ne pa'ire oiyepi pa'ina, yecohua'ire necaë'ë. Jare si'anë Maija'quë ña hue'ñana cuasajë señë. <sup>4</sup> Maija'quë do'ijë, mësarute Maija'quëpi oi sahuani nesicohua'i a'ë cuasajë pa'iyë, yëquë. <sup>5</sup> Cui'ne yëquë mësarute huaso coca quëa maca coa pa'i yë'ose'e cajë quëaye pahuë. Mësarupi asayë, yëquë mësaruru de'oye pa'iyere cajë yo'ose'e, Maija'quë joyo tuture papi yo'ojë cui'ne nuñerepa itirepa cocare quëayë cajë quëase'e.

<sup>6</sup> Quëajëna, mësarupi yëquë pa'iyere cui'ne Ējaë pa'iyere ye'yehuë, Maija'quë coca asa do'ire ai yo'oye pa'itojë. Jaje pa'ina, mësaruru sihuajë asahuë, Jesús cocare Maija'quë joyopi sihuaye isiquëna. <sup>7</sup> Jaje yo'ojë mësaruru de'oye pani iñoñere tì'ahuë, si'a Macedonia cui'ne Acaya sehuosicohua'ire. <sup>8</sup> Mësaruru quë'ro huëose'epi mai Ējaë coca jai saiji, coa si'a hue'ña. Jaje pa'ina, Macedoniase'e cui'ne Acayase'e tì'añe papi. Ai jerepa yequë hue'ñaje tì'api. Tì'acquëna, asayë, mësaruru Maija'quë pa'ire paji

cuasajë pa'iyere. Jaje pa'ina, yëquë mësaru ayere cajë quëaye peoyë. <sup>9</sup> Jaje quëaye pajëna, iohua'ipi quëayë, yëquë mësaru quë'ro do'i saisi maca mësaru yëquëre de'oye pëpani, cui'ne pai de'huase'ere Maija'quë api cuasase'ere jëoni, Maija'quë huajëquëre pani sehuoni necai huëose'ere. <sup>10</sup> Cui'ne quëayë, Maija'quë mamaquëpi ju'isiquëni huëosiquëpi Èjaë Jesucristo ma'tëmopi co'i coja'quë api cajë mësaru utejë pa'iyere. Maire nejoñe daiye huasoquë api, Jesús.

## 2

### *Pablo Tesalonicenses Yo'ose'e*

<sup>1</sup> Maija'quë do'ijë, mësarupi tsoe asayë, yëquë mësaru quë'ro do'i saini coa noni cu'iyë pase'e. <sup>2</sup> Jaje pa'ina, mësarupi tsoe asayë, yëquë ja'në Filiposna ai yo'ose'e, co'acohua'i a'ë cajë josa yo'ojëna. Jaje pa'iquëta'are Maija'quëpi cocaina, quëcojë Maija'quë de'o coca quëahuë, mësarute, jaiye tutu sañope yo'oye pa'itojë. <sup>3</sup> Jaje pa'ina, yëquë yëhuojë soiye cato coa tayose'e peoji. Si'sijë peoji. Cui'ne coa paini cosoñu'u cajë cayeje peoye a'ë. <sup>4</sup> Coa ai jerepa Maija'quëpi i de'o cocare quëaja'cohua'i a'ë caquë ñani sahuani nesicohua'ipi cayë. Paini de'oye yo'o iñoñu'u cajë yo'oma'pë pa'iyë. Coa ai jerepa Maija'quëre pani yëquë joñoa cuasaye ñaquëni cajë yo'oyë. <sup>5</sup> Jaje pa'ina, Maija'quë cui'ne mësaru pa'iyë, yëquë mësarute ëaye asa cuño cocapi cajë, cui'ne curire ti'añu'u cajë yo'oye pañe ñasicohua'i. <sup>6</sup> Paipi de'oye yëquëre cajajë cajë co'eye pahüë. Mësarupi panije yecohua'ipi Cristo jëjo daosicohua'i a'ë cajë yo'oye pa'iquëta'are pahüë. <sup>7</sup> Jaje pa'iquëta'are coa ai jerepa mësarute oijë de'o pëca ja'co mamajëre ñacaio ai de'huayeje pa'ye yo'ohuë, mësarute. <sup>8</sup> Yëquë mësarute ai oë'ë. Jaje pa'ina, coa de'o co-case'e quëaye yëye pahüë, cui'ne yëquë pa'iyëje mësaruna

išiye yēhuē, yēquē mēsarute ai oi do'ire. <sup>9</sup> Maija'quē do'ijē, yēquē pa'iyere cuasajē, ñamiñapi cui'ne mu'señapi co'amaña nehuē. Ja yo'ose'e mēsarupi asayē. Mēsaru acohua'ipi yēquēni co'cañu'u cajē ai yo'oma'cohua'ini cajē yēquēpi nehuē, Maija'quē coca quēa maca.

<sup>10</sup> Mēsaru cui'ne Maija'quē pa'iyē, yēquē nuñere papi si'si peoyepi, yecohua'ijē co'aye yo'oyē caye peoyere papi, yo'ojēna, ñasicohua'i. <sup>11</sup> Cui'ne mēsarupi asayē, yēquē mēsarute pa'i ñapere jerepa yējē yo'oye ne huēose'ere cui'ne oicohua'i pa'ijēna, ca yē'huase'ere pēca ja'quē mamajere yo'oyejē pa'ye. <sup>12</sup> Jaje yo'ojē cui'ne cuañehuē, mēsarute Maija'quēre sehuosicohua'irepa pa'iyere pa'i-jē'ē, Maija'quē yēyere yo'ojē. Ipi mēsarute soipi, i cuañe tē'tere, cui'ne i de'oyere pare i ja're cōni paja'cohua'ire cahuē.

<sup>13</sup> Yēquē quēajēna, asani de'hue Maija'quē cocare pa'ē cajē sehuohuē, mēsaru. Pa'i quēaye a'ē cuasajē sehuoye pañuē, nuñerepa Maija'quē cocare pare iye mēsaru sehuose'e. Jaje pa'ina, mēsaru sehuose'ere cuasajē Maija'quēre de'o'ji cajē pēpajē señē. Maija'quē cocarepa sēte mēsarute itipi yo'oquē pa'iji, sehuocohua'ire. <sup>14</sup> Mēsaru Maija'quē coca sehuo do'ire ai yo'oyē, mēsaru cajeohua'ipi sañope yo'ojēna. Judío pa'i sehuocohua'irejē iohua'i cajeohua'ipi sañope yo'ojēna, ai yo'ohuē, Cristo Jesús tsecohua'ipi. Jaohua'ire yo'ose'eje pa'ye yo'oyē, mēsaruteje. <sup>15</sup> Iye judío pa'ipi Ējaē Jesure huaē'ē, Maija'quēre quēacaicohua'ire huaise'eje pa'ye, cui'ne yēquēreje pēijē eto sahuē. Maija'quēre cui'ne si'aohua'ire sañope yo'oyē. <sup>16</sup> Jaje yo'ojē judío pa'ipi ēseyē, Maija'quē coca judío pa'i peocohua'ire huaso cuañojajē cajē quēayerē. Jaje yo'ojē jero sa'na iohua'i co'aye yo'oyere mēoñē. Jaje yo'ojē pa'icohua'ire yureta'a, titapi, Maija'quē iohua'ire ai yo'oyepi sa'i ja'ñe.

*Pablopi Yëji, Tijupë Sani ÑaÑe Tesalónica Pa'icohua'ire*

<sup>17</sup> Maija'quë do'ijë, mësarute jëoni so'ore pa'inije huanëyema'pë paë'ë. Si'anë cuasahuë, ñama'pë pa'inije, ai esa sani ña'ñe nëina. <sup>18</sup> Yë'ë Pablopi coa si'anëpi sani ñasi'i caquëta'a ti saiye pahuë, Satanáspi, huati ëjaëpi ëse do'ire. <sup>19</sup> ¿Jaje pa'ina, ique a'ni yëquë uteye, yëquë sihuaye cui'ne yëquë nere pahuë cajë cuasa ja'ñe? Mësaruru a'ë, Ëjaë Jesucristo dai maca yëquë sihua ja'ñe. <sup>20</sup> Jaje pa'ijë'ë, mësaruru a'ë, yëquë de'oyerepa nese'ere ñajë sihua ja'ñe.

### 3

<sup>1</sup> Mësarute cuasayepi quëcoye peoyena, tel'i Atenasna pëasi'i cuasahuë. Cuasani pëaquë <sup>2</sup> Timoteore Maija'quë do'iquëre Cristo huasoquë coca quëaquëre jëjo saohuë, jaëpi mësarute tutu isicai cui'ne mësaruru Maija'quë pa'ire paji cuasayere jerepa paye necaijaquë caquë. <sup>3</sup> Necaina, mësaruru acohua'ipi tel'ije ai yo'oye pa'itoje yo'o jujama'pë pa'ijajë caquë jëjo saohuë. Jaje pa'ina, tsoe mësarupi asayë, mai jaje ai yo'o ja'ñe pa'iyë. <sup>4</sup> Iyere mësarute quëahuë, maire ai yo'oye pa'ija'coa cajë. Mësaruru ja're yëquë pa'i maca, iti case'epi ai yo'oye ti'api, mësaruru asase'eje pa'ye. <sup>5</sup> Jaje pa'ina, quëcoyepi peoquëna, Timoteore jëjo saohuë, mësaruru Maija'quëre pa'ire paji cuasajë pa'iyere seni asaja'quëre. Yequë huatipi co'aye yo'oyena ne taouna, yëquë mësarute quëase'epi do'i peoye pa'ima'quë caquë jëjo saohuë.

<sup>6</sup> Yure Timoteo mësaruru quë'ropi co'ini quëapi, mësaruru de'oye Maija'quë pa'ire paji cuasajë cui'ne yecohua'ire oijë pa'iyere. Cui'ne quëapi, mësaruru yëquëre yëjë cuasajë pa'iyere. Cui'ne yëquë mësarute ña ëaquëna, pa'iyëje cui'ne mësarurje yëquëre ña ëaquëna, pa'iyë quëapi.

<sup>7</sup> Maija'quë do'ijë, yëquë co'a ju'ijë cui'ne ai yo'ojë pa'icohua'ini, mësarü ocue pa'i macarepa Maija'quë pa'ire paji cuasajë pa'iyere quëaquëna, asani sihuahuë. <sup>8</sup> Mësarü jaje Ējaëre ocue pa'i macarepa tuiyere asarena, yëquëre huajë pa'i huëose'eje pa'yerepa nëiji. <sup>9</sup> Jaje pa'ina, me Maija'quëre cajë pëpaye'ni mësarü necaiyere ai sihuayere yëquë joñoana ta'ye saise'erepa pani Maija'quë ña hue'ñana? <sup>10</sup> Mu'señapi cui'ne ñamiñapi Maija'quëre señë, jëjo saojë'ë cajë, mësarute sani ñajë mësarute Maija'quë pa'ire paji cuasaye caraye si'aye ne ti'acañu'u cajë.

<sup>11</sup> Maija'quëpi cui'ne mai Ējaë Jesucristopi cocaijaquë yëquë mësarü quë'ro do'i sai ja'ñe. <sup>12</sup> Jare ipi mësarute paire oiye cui'ne sa'ñe ai oijë pa'iyere necaijaquë, yëquë mësarute oiyeje pa'ye oija'cohua'ire. <sup>13</sup> Jare ipi mësarute, mësarü joñoana ocue pa'i macarepa cuasajë pa'iyere nejaquë. Nequëna, de'ocohua'irepa pa'ijë'ë, co'aye yo'o do'i peocohua'ire papi, Maija'quë Diosu ña hue'ñana, mai Ējaë Jesucristo i tsecohua'i de'ocohua'irepa ja're dai maca.

## 4

### *Maija'quë Sihuaquë Ñañere Pa'iyë*

<sup>1</sup> De'oji, jaje pa'iyere sëte Maija'quë do'ijë, Mësarute mai Ējaë Jesucristo mamipi cuañejë señë, Maija'quë sihuaquë ñañere, yëquë ye'yase'ere jerepa yo'ojë pa'ijajë cajë. Tsoe mësarupi jaje pa'iyë.

<sup>2</sup> Jaje pa'ina, tsoe mësarupi asayë, mai Ējaë cuañe tutupi yëquë ye'yajë quëase'e, mësarü yo'o ja'ñere. <sup>3</sup> Maija'quë sihuaquë ñañe iye a'ë, i tsecohua'irepa pa'ijë yequë nomiore panita'a yequë ëmëre ti yo'oma'pë pa'iyere a'ë. <sup>4</sup> Pai ñape nëjohua'ire pajë, de'oyerepa pa'ijë, iohua'ire ëjaohua'ire ñajë paye a'ë. <sup>5</sup> Maija'quëre sehuoma'cohua'i yo'oyeje pa'ye yo'oma'pë pa'ijë'ë, tëto saiperepa ëaye nëiñepi cui'ne co'aye yëyepi airepa pa'i do'ire. Jaje pa'ina,

<sup>6</sup> Maija'quë do'iquëre ti i paye josa yo'ocaima'pë pa'ijë'ë, iye yë'ë quëase'e aye. Jaje yo'ocohua'ire, mai Ējaëpi tuturepa saija'quë api, yëquë mësarute yo'o ma'ñe a'ë quëase'eje pa'ye. <sup>7</sup> Jaje pa'ina, Maija'quë maire soima'ë paji'i, si'sire yo'ojë pa'ija'cohua'ini. Coa ai jerepa ina isisicohua'ipi pa'ija'cohua'ini soipi. <sup>8</sup> Jaje pa'ina, iye ye'yayere paipi co'aye a'ë cajë asaye coecohua'i pani, pa'iti ye'yacohua'ini coema'pë pa'iyë, Maija'quëni coeyë, mësarute i de'o joyo isisiquëni.

<sup>9</sup> Tsoe Maija'quëpi mësarute sa'ñe oijë pa'iyë ye'yasi do'ire, Maija'quë do'ijëja'a sa'ñe oijë pa'iyë aye toyaye pañë. <sup>10</sup> Jaje pa'ina, mësaru si'aohua'ire Maija'quë do'ijëre Macedonia pa'icohua'ire oijë pa'iyë. Jaje pa'iquëta'are jero sa'na ai paire oiyepi mësarute pa'ijaquë cajë cuañëñ. <sup>11</sup> Yecohua'ire josa yo'oma'pë de'oye pa'ijë'ë, mësaru co'amañare pase'e nejë. Yëquë cuañese'eje mësaru jëñapi nejë pa'ijë'ë. <sup>12</sup> Jaje pa'ijëna, sehuoma'cohua'ijë mësarute ëjaohua'ire ñaja'cohua'ire, cui'ne mësarute carayeje peoja'core.

### *Mai Ējaë Dai Ja'ñe*

<sup>13</sup> Maija'quë do'ijë, sehuoma'cohua'i cato ju'isicohua'i huëiye peoji cuasacohua'ipi ai oiyë. Jaje pa'ina, mësarupi jaohua'i oiyeye ju'isicohua'ire ai oima'cohua'ini caquë, ju'isicohua'ire yo'oye quëasi'i. <sup>14</sup> Jesús ju'isiquëpi huëji'i, mai asayeje pa'ye, cui'ne pa'ye Maija'quëpi si'aohua'ire Jesure sehuoni ju'isicohua'ire Jesús ja're cõni daja'quë api.

<sup>15</sup> Jaje pa'ina, cayë, mësarute mai Ējaë ayere ye'yaye sëte. Mai huajëcohua'i Ējaë dai maca pa'icohua'i ju'isicohua'ire du'ru tëto saiye paja'cohua'i a'ë. <sup>16</sup> Jare ipi mai Ējaë ma'tëmopi cuañequë yë'ore papi, tutu quë'ipi, cui'ne huiñaohua'i Ējaërepa yë'opi, cui'ne Maija'quë duruhuëpi cõni jui maca cajeja'quë api. Ja maca Cristore sehuoni

ju'isicohua'ipi du'ru huëija'cohua'i a'ë. <sup>17</sup> Huëtena, ja maca mai huajëcohua'ipi huëisicohua'i ja're çoni mëijë peo de'otona, siri quë'rona sañope ti'aja'cohua'i a'ë, Ëjaëre pare. Ti'ani i ja're çoni ti pa'ija'cohua'i a'ë. <sup>18</sup> Jaje pa'ina, iye cocare sa'ñe cajë yo'o jujahuë cuasacohua'ire tutu isijë'ë, jerepa sihuajë yëjë yo'oja'cohua'ire.

## 5

<sup>1</sup> Iti daija'a mu'se cui'ne iti tëcahuë toyaye pañë, Maija'quë do'ijë. <sup>2</sup> Tsoe mësarupi asayë, mai Ëjaë dai mu'se cato co'amaña imaquë ñami daiyeje pa'ye dasipi. <sup>3</sup> Pai de'oji jo'cua pa'ire payë, si'aye de'oji ca maca coa nejoñepi ti'asipi, jaohua'ire, nomio tsi çoa huëocona, a'si huëoyeje pa'ye. Ja maca jëaye peoji. <sup>4</sup> Maija'quë do'ijë, mësaruru cato nea huë'ñare pa'ima'pë pa'iyë. Co'amaña ñaë yo'oquëna, ña quëquëyeje pa'ye mai Ëjaë da tita mu'se, ña quëquëye. <sup>5</sup> Si'aohua'i mësaruru mia huë'ña acohua'i a'ë, mu'se acohua'i a'ë. Ñami cui'ne neañe acohua'i peoyë. <sup>6</sup> Jaje pa'ina, mai caiñe peoji, yecohua'i yo'oyeje. Coa ai jerepa sëtasicohua'ipi nuñerepa pa'iyere ñajë pañu'u. <sup>7</sup> Jaje pa'ina, çacohua'i çaiñë, ñami. Cui'ne çono cuepecohua'i cuepeyë, ñami.

<sup>8</sup> Jaje pa'iquëta'are mai mu'se acohua'i cato ñare pajë nuñere pare tayo ma'ñere pa'ye pa'iji. Maija'quë pa'ire paji cuasayena cui'ne paire oiyena suñani, soldado i coti saihuë quëna cañapi suñani jëayeje pa'ye, cui'ne huaso tējisicohua'i pa'i ja'ñere uteyena, soldado quëna mapë puani jëayeje pa'ye jëañu'u. <sup>9</sup> Maija'quë nejoja'cohua'ini maire soima'ë paji'i. Coa ai jerepa mai Ëjaë Jesucristo do'ipi huasosicohua'i pa'ijajë caquë soipi. <sup>10</sup> Jaje pa'ina, Jesucristo mai do'ire jucacaji'i, maipi i ja're çoni ju'isicohua'i panije, cui'ne huajëcohua'i pa'inije pa'ijajë caquë. <sup>11</sup> Jaje pa'ina, pai ñape yecohua'ire tutu isicaijë, yo'o

jujahuë cuasacohua'ire jerepa yëjë yo'oye necaijë'ë. Noni jaje yo'ojë pa'icohua'i sëte.

*Pablo Yëhuose'e Sehuosicohua'ire*

<sup>12</sup> De'oji, yure mësarute Maija'quë do'ijëre señë, mësarujä're pa'ijë co'amaña nejë. Iyere yo'ojë'ë cajë, cui'ne yëhuojë, mai Ëjaë yëyeje yo'ojë mësarute sacohua'ire, mësarupi ëjaohua'ire ñaño pa'iji, caquë. <sup>13</sup> Jaje pa'ina, mësarute iohua'i necai do'ire cuasajë ai oijë ëjaohua'ire ñajë pajë'ë. Pa'i ñape sa'ñe de'oye yo'ojë, jo'cua pa'ijë'ë.

<sup>14</sup> Cui'ne Maija'quë do'ijë cuañeñë, mësarute, neñe josa coecohua'ire yëhuojë'ë, caquë. Cui'ne yo'o jujahuë cuasacohua'ire co'caijë'ë, Jesús yo'oyere jerepa yëjë yo'ojä'cohua'ire, cui'ne co'caijë'ë, Maija'quëre cuasaye tutu peocohua'ire. Si'aohua'ire de'oye cuasajë dahuëre yo'ojë co'caijë pa'ijë'ë.

<sup>15</sup> De'hua ñajë pa'ijë'ë, te'ije yequëpi co'aye yo'ouna, cui'ne co'ayepi saisi'i caquë yo'oma'ë pa'ijaquë, coa ai jerepa sa'ñe de'oye yo'ojë pa'ijë, cui'ne si'aohua'ire yecohua'ire de'oye yo'oyere cuasajë'ë.

<sup>16</sup> Si'anë sihuacohua'i pa'ijë'ë. <sup>17</sup> Si'anë Maija'quëre sejë pa'ijë'ë. <sup>18</sup> Si'aye mësarute daiye Maija'quëna yëye a'ë. Jaje pa'ina, de'oji cajë Maija'quëre pëpajë'ë, Cristo Jesure sehuocohua'i sëte.

<sup>19</sup> Toa yayoyeje pa'ye yo'oma'pë pa'ijë'ë, Maija'quë joyo pa'iyere. <sup>20</sup> Cui'ne coecaima'pë pa'ijë'ë, Maija'quëre quëacacohua'i caye pa'ito. <sup>21</sup> Asani si'aye nuñere pa'ni iti cajë neñani de'oyese'e de'huajë'ë. <sup>22</sup> Si'aye co'aye yo'oma'pë pa'ijë'ë.

<sup>23</sup> Jare ipi Maija'quëpi, jo'cua de'oye pa'iyë paquëpi, mësarute nuñerepa de'ocohua'ire necaijaquë, necani mësarujä'ye si'aye joyo, cuasaye cui'ne capë ti si'si te'te peocohua'ire pare ñacai pajaquë mai Ëjaë Jesucristo dai



mu'sere caquë. <sup>24</sup> Mësarute soisiquë ti tayoma'quë api. Jaje pa'ina, i case'ejë pa'ye ne ti'aja'quë api.

*Pëpa Tëjyë*

<sup>25</sup> Maija'quë do'ijë, yëquëre Maija'quëre secacaijë'ë.

<sup>26</sup> De'oye sihuayepi sihuajë, pëpacaijë'ë, si'a sehuosico-hua'ire.

<sup>27</sup> Mai Ëjaë cuãnequërepa do'ipi ca nëoñë, mësarute, iye toya ja'hua si'aohua'ire Maija'quë do'ijëre ña asojë'ë caquë.

<sup>28</sup> Mai Ëjaë Jesucristopi mësaruna i coa necaiyepi yo'o-quëna, pa'ijë'ë.

Maija'quë Huajë Ca Nëose'e  
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

### Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 14 Jun 2022 from source files dated 13 Jun 2022

995e68c5-fe57-54e6-bf8e-0637526d3f7d